

四庫全書

集部

欽定四庫全書

集部

御選唐宋詩醇卷四十四

五

詳校官侍講<sub>臣</sub>王燕緒

主事銜<sub>臣</sub>徐以坤覆勘

總校官降調編修<sub>臣</sub>倉聖脉

校對官編修<sub>臣</sub>吳舒帷

謄錄監生<sub>臣</sub>薩龍光

欽定四庫全書

御選唐宋詩醇卷四十四

山陰陸游詩三

目錄

西巖翠屏閣

雨中山行至松風亭忽澄霽

贈宋道人

獵罷夜飲示獨孤生

秋晚登城北門

莫秋

數日暄妍頗有春意予閒居無日不出遊戲作

江樓醉中作

曳策

謁漢昭烈惠陵及諸葛公祠宇

大雪歌

訪客至西郊

夜寒

故蜀別苑在成都西南十五六里梅至多有兩大  
樹夭矯若龍相傳謂之梅龍予初至蜀嘗為作詩  
自此歲常訪之今復賦一首丁酉十一月也

閒意

書雨

莫冬夜宴

謁石犀廟

江上散步尋梅偶得絕句

大醉梅花下走筆賦此

廣都江上作

道室夜意

城南王氏莊尋梅

遊諸葛武侯書臺

眉州披風榭拜東坡先生遺像

南定樓遇急雨

舟中對月

涪州道中

北巖

忠州禹廟

龍興寺吊少陵先生寓居

遊萬州岑公洞

萬州放船過下巖小留

楚城

舟出下牢關

峽口夜坐

初到荊州

阻風

小雨極涼舟中熟睡至夕

岳陽樓

黃鶴樓

自雪堂登四望亭因歷訪蘇公遺跡至安國院



舟行蘄黃間雨霽得便風有感

長風沙

登賞心亭

將至京口

沂谿

冬夜聞雁有感

月夕

自雲門之陶山肩輿者失道行亂山中有茅舍小

塘極幽邃求見主人不可意其隱者也

園中雜書

池亭夜賦

雙清堂夜賦

橋南納涼

初秋夢故山覺而有作

別建安

紫谿驛

月巖

聞雁

春雨

南窓睡起

感舊絕句

夏日晝寢夢遊一院闐然無人簾影滿堂惟燕跼  
箏弦有聲覺而聞鐵鐸風響璆然殆所夢也邪因  
得絕句

書懷絕句

雨後極涼料簡篋中舊書有感

秋夜

雨夜

豐城高安之間憇民家景趣幽邃為之慨然懷歸

寄奉新高令

予欲自嚴買船下七里灘謁嚴光祠而會歸灘淺  
陸行至桐廬始能泛江因得絕句

辛丑正月三日雪

雪霽歸湖上過千秋觀少留

題山家壁

憶昔

秋夜

九月三日泛舟湖中作

新寒

湖村月夕

橫塘

蔬圃

五雲門晚歸

夜汲井水煮茶

寄朱元晦提舉

乍晴風日已和泛舟至扶桑埭徘徊西村久之

携癭尊醉梅花下

城西接待院後竹下作

幽居春夜

晨起

春遊

八月十四日夜湖山觀月

夜聞秋風感懷

草書歌

夜泊水村

自妙相歸將至杜浦堰舟中作





欽定四庫全書

御選唐宋詩醇卷四十四

山陰陸游詩三

西巖翠屏閣

把酒孤亭半日留  
西巖獨擅鶴山秋  
也知絕境終難賦  
且喜閒身得縱遊  
鶻起危巢時磔磔  
鹿鳴深澗暮呦呦  
人生適意方為樂  
甲第朱門祇自囚  
五六造語幽絕寂  
歷之境宛然在目

雨中山行至松風亭忽澄霽

煙雨千峰擁髻鬟忽看青嶂白雲間  
卷藏破墨營丘筆却展將軍著色山

贈宋道人

我不如昔人騎鶴上九天玉簡奏事虛  
皇前平生畱養氣羸全兩脚馳走輕如  
煙鳥道懸崖忽飛騫戲擲短劍聲鏗然  
轉盼跳下千仞淵已復取劍升層巔騰  
猿俊鶻爭後先飢食松花掬飛泉金骨  
綠髓漸凝堅口哦七字

黃庭篇西來欲訪挾彈僊丹經劒訣更精研嗟哉一失  
五百年作詩付子勿妄傳

獵罷夜飲示獨孤生

白袍如雪寶刀橫醉上銀鞍身更輕帖草角鷹掀兔窟  
憑風羽箭作鷗鳴闕河可使成南北豪傑誰堪共死生  
欲疏萬言投魏闕燈前攬筆涕先傾

直從胸臆流出如聞撫髀之歎

秋晚登城北門

幅巾藜杖北城頭  
卷地西風滿眼愁  
一點烽傳散關信  
兩行雁帶杜陵秋  
山河興廢供搔首  
身世安危入倚樓  
橫槊賦詩非復昔  
夢魂猶繞古梁州

神似少陵

莫秋

時序中年速風霜  
客路長孤愁  
巴月白清夢  
楚山蒼燈  
暗秋銜壁鐘  
疎夜殷床端  
居有微祿不敢恨  
殊方

數日暄妍頗有春意  
予閒居無日不出遊  
戲作

小春花蕾索春饒已有暄風入紫貂村路雨晴鳩婦喜  
射場草綠雉媒驕苑邊結客飛金勒樓上誰家弄玉簫  
莫怪夕陽歸獨後早梅喚我度谿橋

原註蜀宣華苑  
在摩訶池上

### 江樓醉中作

淋漓百榼宴江樓秉燭揮毫氣尚遒天上但聞星主酒  
人間寧有地埋憂生希李廣名飛將死慕劉伶贈醉侯  
戲語佳人頻一笑錦城已是六年留

原註退之詩云越  
女一笑三年留

### 曳策

原註遊  
房園作

慈竹蕭森拱廢臺醉歸曳策一徘徊紛紛落日牛羊下  
黯黯長空霰雪來三峽猿催清淚落兩京梅傍戰塵開  
客懷已是淒涼甚更聽城頭畫角哀

觸緒即來自是此翁忠悃與杜陵無二賞其氣之蒼老  
謁漢昭烈惠陵及諸葛公祠宇

雨止風益豪雪作雲不動淒涼漢陵廟衰草卧翁仲畫  
妓空笙竽土馬閑羈鞚壤沃黃犢耕柏密幽鳥哢尚想  
忠武公身任社稷重整整渭上營氣已無岐雍少須天

意定破賊寧患衆興亡信有數星隕事可痛陵邊四五

家茆竹居接棟手皴紙上箔

原註居民皆以造紙為業

酷熟酒鳴甕

雖嗟生理微亦足逭飢凍劉葛固雄傑閱世均一夢論  
高常近迂才大本難用九原不可作再拜臨風慟

潘問奇曰事未必然聊為孔明吐氣

大雪歌

原註累日作雪竟不成戲賦此篇

長安城中三日雪潼關道上行人絕黃河鐵牛僵不動  
承露金盤凍將折虬鬚豪客狐白裘夜來醉眠寶釵樓

五更未醒已上馬衝雪却作南山遊千年老虎獵不得  
一箭橫穿雪皆赤挈空爭死作雷吼震動山林裂崖石  
曳歸擁路千人觀髑髏作枕皮蒙鞍人間壯士有如此  
胡不來歸漢天子

一腔豪氣千古奇文覺希逸雪賦直是兒女情多風雲  
氣少

訪客至西郊

撼撼敗葉飛黯黯寒雲低村墟與市里觸目一慘悽今



日病體輕駕言適城西丹柿滿野店青帘出江隄獵騎  
載雉兔樵檐懸鵝雞居人各自得使我念故谿故谿不  
敢說况復朝金閨傷哉鬻雪翁歲晚猶牧羝下愚不自  
還大惑終身迷君恩何由報力耕愧黔黎

夜寒

清夜焚香讀楚詞寒侵貂褐歎吾衰輕冰滿研風聲急  
忽記山陰夜雪時

故蜀別苑在成都西南十五六里梅至多有兩大

樹天驕若龍相傳謂之梅龍子初至蜀嘗為作詩  
自此歲常訪之今復賦一首丁酉十一月也

昔年曾賦西郊梅茫茫去日如飛埃即今衰病百事嬾  
陳迹未忘猶一來蜀王故苑犁已遍散落尚有千雪堆  
朱樓玉殿一夢破煙蕪牧笛遺民哀兩龍卧穩不飛去  
鱗甲脫落生莓苔精神最遇雪月見氣力苦戰冰霜開  
羈臣放士耿獨立淑姬靜女知誰媒摧傷雖多意愈厲  
直與天地爭春回蒼然老氣壓桃杏笑我白髮心尚孩

微風故為作嫵媚一片吹入黃金壘

詩以言情賦物而情不至不足以為詩羈臣放士耿獨立淑姬靜女知誰媒蓋亦黯然自傷矣

閒意

柴門雖設不曾開為怕人行損綠苔  
妍日漸催春意動好風時捲市聲來  
學經妻問生疎字嘗酒兒斟漱盃  
盃安得小園寬半畝黃梅綠李一時栽

書雨

仲冬候始寒丙夜天正黑雨來挾風助吼擊不遺力聲  
如拔高山勢若伐強國初憂老栢折遂恐石筍踣乾坤  
本無心百神各効職蛟龍鬪歲暮豪橫理莫測農功幸  
已成龍怒亦會息屋漏何足言袖手姑默默

信手拈來輒成奇語中間接筆尤為健絕

暮冬夜宴

官機錦茵金蹙鳳舞娃釵墮雙鬟重寶爐三尺香吐霧  
盡燭如椽風不動主人愛客情無已箏聲未斷歌聲起

亦知百歲等朝露便恐一歡成覆水  
爐紅酒綠春為回  
坐上梅花連夜開  
堂前只尺異氣候  
永合平池霜壓階  
妙於諷諭風人之遺

謁石犀廟

閒過石犀祠登堂一歎歎江回陵谷變碑斷市朝非

原註

有王蜀時修廟碑銘

荒圃連寒壠斜陽映夕霏興亡俱昨夢惆悵

跨驢歸

江上散步尋梅偶得絕句

小南門

原註萬里橋門  
一名小南門

外野人家短短疎籬綠白沙紅

稻不須鸚鵡啄清霜催放兩三花

大醉梅花下走筆賦此

閉門坐歎息不飲輒千日忽然酒興生一醉須一石擔  
頭花易老旗亭酒常窄出郊索一笑放浪謝形役把酒  
梅花下不覺日既夕花香襲襟袂歌聲上空碧我亦落  
烏巾倚樹吹玉笛人間奇事少頗謂三勑敵酒闌江月  
上珠樹挂寒壁便疑從此僊朝市長掃迹醉歸亂一水

頓與異境隔終當騎梅龍海上看春色

原注梅龍蓋蜀先中故物也

風流清興如在目前

廣都江上作

微波不搖江纖雲不行天我來倚杖立天水相澄鮮平  
遠望不盡日落自生煙梅花耿獨立雪樹明前川好風  
吹我衣春色已粲然東村聞酒美買醉上漁船

道室夜意

寒泉漱酒醒午夜誦仙經茶鼎聲號蚓香盤火度螢齋

心守玄牝閉目得黃寧寄語山中友因人送茯苓

黃庭經何不食氣太和精故能不死入黃寧注即黃庭也

城南王氏莊尋梅

涸池積槁葉茆屋圍疎籬可憐庭中梅開盡無人知寂寞終自香孤貞見幽姿雪點滿綠苔零落尚爾奇我來不須晴微雨正相宜臨風兩愁絕日暮倚筇枝

骨格不凡



遊諸葛武侯書臺

沔陽道中草離離卧龍往矣空遺祠當時典午稱猾賊  
氣喪不敢當王師定軍山前寒食路至今人祠丞相墓  
松風想像梁甫吟尚憶幡然會三顧出師一表千載無  
遠比管樂蓋有餘世上俗儒寧辦此高臺當日讀何書  
警策語故不在多

眉州披風榭拜東坡先生遺像

蜿蜒回顧山有情平鋪十里江無聲孕奇蓄秀當此地

鬱然千載詩書城高臺老仙誰所寫仰視眉宇寒崢嶸  
百年醉魂吹不醒飄飄風袖筇枝橫爾來逢迎厭俗子  
龍章鳳姿我眼明北扉南海均夢耳謫墮本自白玉京  
惜哉畫史未造極不作散髮騎長鯨故鄉歸來要有日  
安得春江變酒從公傾

南定樓遇急雨

行遍梁州到益州今年又作度瀘遊江山重複爭供眼  
風雨縱橫亂入樓人語朱離逢峒獠棹歌欸乃下吳舟

天涯住穩歸心嬾登覽茫然却欲愁

屬對之妙神韻自然不可湊泊

舟中對月

百壺載酒遊凌雲醉中揮袖別故人依依向我不忍別  
誰似峨眉半輪月月窺船窗挂淒冷欲到渝州酒初醒  
江空裊裊釣絲風人靜翩翩葛巾影哦詩不睡月滿船  
清寒入骨我欲仙人間更漏不到處時有沙禽背船去

涪州道中

遠客喜歸路清遊逾昔聞雨添山翠重舟壓浪花分洛  
叟經名世張侯勇冠軍

原註郡境有伊川先生故居及張翼德祠

懷人不可

覲袖手對爐熏

北巖

原註有程正叔先生祠堂

艤船涪州岸携兒北巖遊搖櫂橫大江褰裳躡高樓雨  
昏山半失江漲地欲浮老矣寧再來為作竟日留烏帽  
程丈人閉戶本好修駭機一朝發議罪至竄投黨禁久  
不解胡塵暗神州修怨以稔禍哀哉誰始謀小人無遠

略所懷在私讐後來其鑑茲賦詩識巖幽

持論嚴正所見者大集中如此等作於君子小人之分判若黑白足以觀其所處矣

忠州禹廟

古郡巴蠻國空山夏禹祠  
鴉歸暗庭栢巫拜薦江蘼  
草蔓青緣壁苔痕紫滿碑  
欲歸頻悵望回棹夕陽時  
雖非橘柚龍蛇之比亦老氣無敵

龍興寺弔少陵先生寓居

中原草草失承平  
戍火胡塵到兩京  
扈蹕老臣身萬里  
天寒來此聽江聲

雙管齊下一寫兩枝

張完臣曰草草二字狀盡衰世景象謂之咏少陵可謂之自咏亦可

遊萬州岑公洞

原註岑公閒時人居此二十年得道仙去

大業征遼發閭左  
軍興書檄煎膏火  
此時也復有閒人  
自引巖泉拾山果  
後六百歲吾來遊  
洞中正夏淒如秋

乳石床平可坐卧水作珠簾月作鉤十年神遊八極表  
浮名坐覺秋豪小試問岑公迎我不鶴飛忽下青松杪  
萬州放船過下巖小留

畫船四月滿旗風飲散匆匆鷁首東醉裏偏憐江水綠  
意中已想荔枝紅斷碑零落莓苔遍幽澗淙潺略約通  
一疋寧無好東絹憑誰畫此碧玲瓏

楚城

江上荒城猿鳥悲隔江便是屈原祠一千五百年間事

只有灘聲似舊時

王士禎曰歸州在江北山巔江南有楚臺山山上有  
楚王臺及舊秭歸城三閭大夫實產是鄉王龜齡詩  
城郭舊為夔子國人民多是楚王孫陸放翁詩江上  
荒城猿鳥悲隔江便是屈原祠一千五百年間事只  
有灘聲似舊時何仲默詩古郡山頭數家住客舟江  
上一燈明竹枝慣聽巴人曲鳥道纔通楚國程荒山  
寒日江聲怒號獨坐吟此數詩不必猿鳴三聲淚霑



裳也

張完臣曰聲味都盡而語氣不斷此之謂詩

舟出下牢關

大舸凌驚濤飛度青玉峽虛壁雲濛濛陰洞風颯颯拂  
天松蓋偃入水山脚挿炎曦忽摧破亭午手忘策懸知  
今夜喜月白宿沙夾曠哉七澤遊盟鷗不須歎

押韻皆穩

峽口夜坐

三峽至此窮兩壁猶峭立估船無時行婦盍有夜汲風  
生樹影動月碎水流急草根綴微露螢火飛熠熠吾行  
已四旬纔抵楚西邑浩歌散鬱陶還舟覺衣濕

初到荊州

萬里泛仙槎歸來髯未華蕭蕭沙市雨淡淡渚宮花斷  
岸添新漲高城咽晚笳船窗一樽酒半醉落烏紗

阻風

沙市三日風萬鼓鳴船頭欲去不得發卧對青燈幽聽

兒誦離騷可以散我愁微言入孤夢恍與屈宋遊睡起  
銅瓶響欣然喚茶甌吾道無淹速風伯非所尤

小雨極涼舟中熟睡至夕

舟中一雨掃飛蠅半脫綸巾卧翠藤清夢初回窗日晚  
數聲柔艣下巴陵

盧世灌曰只末一句有多少蘊含在

岳陽樓

身如病鶴短翅翎雨雪飄灑號沙汀天風忽吹不得住

東下巴峽泛洞庭軒皇張樂雖已矣此地至今朝百靈  
雄樓岌嶱鎮吳楚我來舉手捫天星帆檣纔放已隱隱  
雲氣亂入何冥冥龜鼉出沒蛟鰐橫浪花遮盡君山青  
黃衫仙翁喜無恙袖劍近到城南亭眼前俗子敗人意  
安得與翁同醉醒

黃鶴樓

手把仙人綠玉枝吾行忽及早秋期蒼龍闕角歸何晚  
黃鶴樓中醉不知江漢交流波渺渺晉唐遺跡草離離

平生最喜聽長笛裂石穿雲何處吹

別出機軸邈然清負結語運化入妙幾於滅盡針線之迹

自雪堂登四望亭因歷訪蘓公遺迹至安國院

我醉飛屐登孱顏杖杖出沒風煙間三山蔥朧鮫鰒靜  
九關肅穆虎豹閒幾年金骨煉綠髓此日始得窮躋攀  
老僊歸侍紫皇案空有野水流淙潺蜿蜒翠阜圍綠野  
似嶺非嶺山非山向來龍蛇滿雪壁雷電下取何時還

名花亦已天上去居人指似題詩處九十一翁不識公

我抱此恨知無窮

原註定惠院已廢海索亦不復在安國老僧景滋年九十一自言東坡去

黃後四

年方生

舟行蘄黃間雨霽得使風有感

天青雲白十分晴帆飽舟輕盡日行江底魚龍貪晝睡  
淮南草木借秋聲好山縹渺何由住華髮蕭條只自驚  
莫怪時人笑踈嬾宦情元不似詩情

長風沙

江水六月無津涯驚濤駭浪高吹花艣聲已出雁翅浦  
荻夾喜入長風沙長風自古三巴路檣竿參差雜煙樹  
南船北船各萬里淒涼小市相依住歌呼雜沓燈火明  
黃昏風死浪亦平勞苦舟師剩沽酒安穩明朝到池口

登賞心亭

蜀棧秦關歲月適今年乘興却東遊全家穩下黃牛峽  
半醉來尋白鷺洲黯黯江雲瓜步雨蕭蕭木葉石城秋  
孤臣老抱憂時意欲請遷都涕已流

將至京口

卧聽金山古寺鐘三巴昨夢已成空  
船頭坎坎回帆鼓  
旗尾舒舒下水風  
城角危樓晴靄碧  
林間雙塢夕陽紅  
銅瓶愁汲中濡水  
不見茶山九十翁

原註頃在京口嘗  
取中濡水寄曾文

清公

泝谿

射的峰前禹廟東  
短篷三扇卧衰翁  
閒携清聖濁賢酒  
重試朝南莫北風  
水落痕留紅蓼節  
雨來聲滿綠蒲叢



衝煙莫作匆匆去擬看溪丁下釣筒

冬夜聞雁有感

從軍昔戍南山邊傳烽直照東駱谷軍中罷戰壯士閒  
細草平郊恣馳逐洮州駿馬金絡頭梁州毬場日打毬  
玉杯傳酒和鹿血女真降虜彈箜篌大呼拔幟思野戰  
殺氣當年亦浮面南遊蜀道已低摧猶據胡牀飛百箭  
豈知蹭蹬還江邊病臂不復能開弦夜聞雁聲起太息  
來時應過桑乾磧

欽定四庫全書

御選唐宋詩醇  
卷四十四

豪邁一往壓倒高岑

月夕

開戶滿庭雪徐看知月明微風入叢竹復作雪來聲俗  
塵不待掃凜然肝肺清村深無漏鼓鶴唳報三更  
以雋語寫幽致列子御風冷然善也

自雲門之陶山肩輿者失道行亂山中有茅舍小  
塘極幽邃求見主人不可意其隱者也

陂池幽處有茅堂井臼蕭條草樹荒小鴨怯波時聚散

病疏傷蠹半青黃童兒衝雨收魚網婢子聞鐘上佛香  
我亦暮年思屏迹數椽何計得連牆

園中雜書

殘花委地筍掀泥香枕詩囊到處携幽夢欲成誰喚覺  
半窓斜日鷓鴣啼

池亭夜賦

池上小亭幽清宵秉燭遊荷盤時瀉露螢火早知秋有  
感歲時速無聲河漢流殊方不堪住歸夢繞滄洲

欽定四庫全書

御選唐宋詩醇  
卷四十四

雙清堂夜賦

陸子病少間獨卧谿上堂人靜魚自躍風定荷更香素  
月行中天流螢失孤光歸鳥飛有聲度此十里塘嗟我  
獨何事遲暮客異鄉太息搔短髮起視夜未央

妙於體物流螢失孤光與螢火早知秋各有妙理風定  
荷更香風定池蓮自在香亦復各成妙句前後三詩不  
妨並存

橋南納涼

曳杖來追柳外涼，畫橋南畔倚胡牀。  
月明船笛參差起，風定池蓮自在香。  
半落星河知夜久，無窮草樹覺城荒。  
碧筒莫惜頽然醉，人事還隨日出忙。

初秋夢故山覺而有作

陂水白茫茫，草煙濕霏霏。  
牧童一聲笛，落日無餘暉。  
遙山已漸隱，村巷亞竹扉。  
老翁延我入，苦謝柿栗微。  
幸逢歲有秋，一醉君勿違。  
念此動中懷，命駕吾將歸。

別建安

軟帽揚鞭晚出城驛亭燈火向人明多情葉上蕭蕭雨  
更把新涼送客行

紫谿驛

原註信州鉛山縣

雲外丹青萬仞梯木陰合處子規啼嘉陵棧道吾能說  
略似黃亭到紫谿

筆有天趣此作運化工部下篇又用太白皆極鑪錘之  
妙

月巖

幾年不作月巖遊萬里重來已白頭雲外連娟何所似  
平菴江上半輪秋

淡淡自合刻劃即失之矣

聞雁

過盡梅花把酒稀熏籠香冷換春衣秦關漢苑無消息  
又在江南送雁歸

張完臣曰可謂深至

春雨

冬旱土不膏愛此春夜雨四郊農事興老穉迭歌舞相  
呼長沮耕分喜樊遲圃豐年已在目亭障靜桴鼓我歸  
未有期一官寄倉庾幸復寬簡書不敢恨羈旅

平平寫去澹雅可愛豐年十字抵得一篇喜雨亭記

南窓睡起

夢中忘却在天涯一似當年錦里時狂倚寶箏歌白紵  
醉移銀燭寫烏絲酒來郫縣香初壓花送彭州露尚滋  
起坐南窗成絕嘆玉樓乾鵲誤歸期

盧世淮曰三四俊爽自是佳句

晝漏迢迢暑氣清不妨小倦帶餘醒夢從隴客聲中斷  
愁向湘屏曲處生風度簾旌紅浪颭窻明香岫碧雲橫  
閒情賦罷憑誰寄悵望壺天白玉京

感舊絕句

鵝黃酒邊綠荔枝

原註鵝黃廣漢酒名綠荔枝出叙州

摩訶池上納涼時

冰紈不畫驂鸞女却寫江南白紵辭

盧世淮曰有世外音響當於空際遇之

夏日晝寢夢遊一院閒然無人簾影滿堂惟燕跼  
箏弦有聲覺而聞鐵鐸風響粲然殆所夢也邪因  
得絕句

桐陰清潤雨餘天  
簷鐸搖風破晝眠  
夢到畫堂人不見  
一雙輕燕蹴箏弦

書懷絕句

不到天台三十年  
草菴猶記宿雲邊  
老僧曉出松門去  
手挈軍持取澗泉

絕句源出樂府但取神韻趣在有意無意之間唐人推青蓮龍標二家擅場作者妙處深得風人之致視唐殆無愧色此不可以時代拘者也

雨後極涼料簡篋中舊書有感

日暎小雨不至晡雨雖未足涼有餘細泉泠泠咽幽竇清吹策策驚高梧笠澤老翁病蘇醒欣然起理西齋書十年燈前手自校行間顛倒黃與朱區區樸學老自信要與萬卷歸林廬爾來世俗好變古鑿空飾詐無根株



愀然撫几三太息力薄抱恨何由祛  
蘭臺漆書非已責  
且為籤牒除蠹魚

秋夜

湖海秋初到房櫳夜轉幽露濃驚鶴夢月冷伴蛩愁生

計依微祿年光墮遠遊嚴灘已在眼早晚放孤舟

原註  
去年

欲自三衢州行泛七里瀨  
歸山陰今竟當為此行也

雨夜

庭院蕭條秋意深銅爐一炷海南沉幽人聽盡芭蕉雨

獨與青燈話此心

豐城高安之間憩民家景趣幽邃為之慨然懷歸  
數家聚雲根細路入叢薄濺濺石渠水來往一略約有  
無鄰里通笑語婦子樂濁醪時相就青蔬缺鹽酪日暮  
歸閉門績火星煜爚先期畢租稅老不入城郭嗟予獨  
何事早挿紅塵脚故山未成歸悵望有餘忤

寄奉新高令

小雨催寒著客袍草行露宿敢辭勞歲饑民食糟糠窄

吏情官倉鼠雀豪只要閭閻寬箠楚不須亭障肅弓刀  
九重屢下丁寧詔此責吾曹未易逃

此真良二千石矣察吏恤災安民弭盜奉公任職八句  
中色色具到却一氣渾成不冗不腐風雅遺軌何可多  
得鶴林玉露載王十朋真德秀二詩命意雖同而氣格  
相去遠矣

予欲自嚴買船下七里灘謁嚴光祠而歸會灘淺  
陸行至桐廬始能泛江因得絕句

桐廬縣前舫聲急蒼煙茫茫白鳥雙亂山日落潮未落  
勝絕不減吳松江

風格絕佳

辛丑正月三日雪

開歲尚殘冬佳哉雪意濃潤歸千里麥聲亂五更鐘簾  
隙收初密牆隅積已重龍圍笑羔酒狐腋襲駝茸危檻  
臨歌竹幽窗聽墮松忽思西戍日憑堞待傳烽

原註予  
從戎日

雪大雪中登興元城上  
高興亭待平安火至

龍團笑羔酒用陶穀事妙於不覺

雪霽歸湖上過千秋觀少留

縱轡不嫌遠逢山猶一登夕陽陂渺渺殘雪塢層層折  
竹黃遮道飢鳥下啄冰欲歸還小駐倚杖對峻嶒

題山家壁

山中無傳漏猿鳴知既夕芳藤上幽援素月照高壁主  
人殊喜事歡若有夙昔稚子檠竹檠炊黍持餉客卜隣  
雖未辦清嘯聊自適衰病久廢詩筆端歎荆棘

憶昔

憶昔浮江發劍南夕陽船尾每相銜  
楠陰暗處尋高寺

荔子紅時宿下巖

原註高寺在瀘州下巖在雲安軍

硤口烹猪賽龍廟

沙頭伐鼓挂風帆區區陳迹何由記  
惟有征塵尚滿衫

秋夜

秋氣侵帷夢不成一燈西壁翳還明  
風高露井無桐葉  
雨急煙村有雁聲  
擊筑誰同燕市飲  
賃春方作會稽行  
從來自許知何等  
堪歎江湖白髮生

涼風又落南宮木老雁孤鳴漢北州不及領聯之含蘊  
九月三日泛舟湖中作

兒童隨笑放翁狂又向湖邊上野航魚市人家滿斜日

菊花天氣近新霜重重紅樹秋山晚獵獵青帘社酒香

隣曲莫辭同一醉十年客裏過重陽

原註予自庚寅至辛丑始見九日於

山故

### 新寒

病怯新寒欲不禁南窗擁褐夜愔愔江湖跌宕送餘日

書劍蕭條孤壯心杜曲新愁隨斷雁遼陽遺恨入踈砧  
此懷擬向何人說賴有昏燈伴苦吟

湖村月夕

客路風塵化素衣閒愁冉冉鬢成絲平生不負月明處  
神女廟前聞竹枝

盧世灌曰色相俱空

橫塘

橫塘南北埭西東拄杖飄然樂未窮農事漸興人滿野



霜寒初重雁橫空參差樓閣高城上寂歷村墟細雨中  
新買一蓑苔樣綠此生端欲伴漁翁

原註是日偶買蓑衣甚妙

疏圃

山翁老學圃自笑一何愚硯瘠財三畝勤劬賴兩奴正  
方畦畫局微潤土融酥翦闢荆榛盡鉏犁磊塊無過溝  
橫略約聚甍起浮屠

原註拾園中瓦礫作小墻

隙地成瓜援餘功及

芋區如絲細生菜似鴨爛蒸壺此事今真辦東歸不為  
鱸

排比瑣事點染閒情雖云遊戲亦斐亹可觀

五雲門晚歸

高城帶遠林落日動寒砧  
行客自朝暮青山無古今  
衰遲慙逸氣憂患足危心  
溪迳滯歸艇何時春水深  
以高韻勝置盛唐人集中不復可辨

夜汲井水煮茶

病起罷觀書袖手清夜永  
四鄰悄無語燈火正淒冷  
山童亦睡熟汲水自煎茗  
鏘然轆轤聲百尺鳴古井  
肺腑

凜清寒毛骨亦蘇省歸來月滿廊惜踏踈梅影

寄朱元晦提舉

市聚蕭條極村墟凍餒稠勸分無積粟告糴未通流民  
望甚飢渴公行胡滯留徵科得寬否尚及麥禾秋

惻然仁者之言四十字不愧古人羅大經謂文公於詩  
獨取放翁以其氣質渾厚殆未足以盡之

宋史文公本傳淳熙七年浙東大饑易提舉浙東常  
平茶鹽事即日單車就道移書他郡募米商蠲其征

北至部米已輻輳與僚屬鉤訪民隱至廢寢食雖深山窮谷拊存不遺事竣宰相王淮贊於上曰熹荒政乃行其所學民被實惠

乍晴風日已和泛舟至扶桑埭徘徊西村久之

十日風雨今日晴衰病忽減思閒行接羅一幅煙霧薄  
舴艋八尺鳧鷖輕亭亭孤塢遠天碧曲曲深菴斜陽明  
數家茅屋門晝掩不聞人聲聞碓聲身似龐公不入城  
東阡南陌餞餘生新年倘有豐年喜買酒漁村看太平

攜癭尊醉梅花下

楠癭作尊容斗許擁腫輪囷元媚嫵肯從放翁來住山  
誰云置身不得所山房寂寞久不飲作意欲就梅花語  
我病鮮歡花更甚日暮淒涼泣殘雨人生萬事雲茫茫  
一醉常恐俗物妨正須仙人冰雪膚來伴老子鐵石腸  
花前起舞花底卧花影漸東山月墮癭尊未竭狂未休  
笑起題詩識吾過

城西接待院後竹下作

水邊小立因古城上有巨竹數百箇一徑蛇蟠不容脚  
平處乃可十客坐裊裊共看風枝舞蔌蔌時聽春籟墮  
古佛不粧香火冷瘦僧如腊袈裟破門前西去長安路  
日夜舳舻銜尾過老夫本乏臺省姿且就清陰曲肱卧  
幽居春夜

暮景催人雪鬢雙十年始復反吾邦雪逢佳月每避舍  
酒壓閒愁如受降三弄笛聲初到枕一枝梅影正橫窗  
要知清夢遊何許不釣桐江即錦江

頸聯圓妙有彈丸脫手之樂

晨起

小雨濕清曉新鶯啼早春年光驚病眼節物屬閒身已  
硤東連楚嶠山北控秦遠遊端可繼敢恨素衣塵

春遊

平生樂行役不耐常閉戶今朝新雨霽一笑整巾屨青  
猿導幽蹊春草伴微步雖云尊酒薄蔬果亦略具辛夷  
發高枝楊柳吹墮絮行歌不知遠落日呼野渡橫林已

棲鴉淺水猶立鷺歸來意頗豪古錦有新句

八月十四日夜湖山觀月

長空露洗玻璃碧紫金之盤徑三尺忽看擘地出人間  
桂樹扶疎如淡墨攬衣獨立鏡湖邊風露萬頃秋渺然  
開帆詎必入東海騎鯨便可追飛仙冰壺玉瀝侵骨冷  
醉看孤鸞舞清影夜闌歸舍人已眠却倩天風為吹醒  
奇語得自眼前轉覺出人意表

夜聞秋風感懷



西風一夜號庭樹起攬戎衣淚濺襟殘角聲催關月墮  
斷鴻影隔塞雲深數篇零落從軍作一寸淒涼報國心  
莫倚壯圖思富貴英豪何限死山林

草書歌

傾家釀酒三千石閒愁萬斛酒不敵今朝醉眼爛巖電  
提筆四顧天地窄忽然揮掃不自知風雲入懷天借力  
神龍戰野昏霧腥奇鬼摧山太陰黑此時驅盡胸中愁  
槌牀大叫狂墮幘吳牋蜀素不快人付與高堂三丈壁

與醉後草書一篇各成奇致

夜泊水村

腰間羽箭久凋零太息燕然未勒銘老子猶堪絕大漠  
諸君何至泣新亭一身報國有萬死雙鬢向人無再青  
記取江湖泊船處卧聞新雁落寒汀

率多胸臆兼有氣骨可為南渡君臣慨然太息

自妙相歸將至杜浦堰舟中作

斜陽發東郭初夜轉西城寺閣踈鐘動漁村遠火明蒼

茫林靄滅撲漉水禽驚漸喜吾廬近遙聞過埭聲

御選唐宋詩醇卷四十四

欽定四庫全書

御選唐宋詩醇卷四十五

山陰陸游詩四

目錄

秋興

三江舟中大醉作

樊江晚泊

秋夕

秋雨排悶十韻

寄題朱元晦武夷精舍

長安道

村舍

幽居感懷

遲莫

自若耶溪舟行杭鏡湖而歸

骨相

感憤

晚出偏門

過杜浦橋

莊器之作招隱閣項平父諸人賦詩予亦繼作

溪上醉吟

雨中泊舟蕭山縣驛

初夏遊凌氏小園

題少陵畫像

初冬雜題

小雨

題徐淵子環碧亭亭有茶山曾先生詩

臨安春雨初霽

飲張功夫園戲題扇上

小舟過御園

春遊絕句

雨後

夜汲

新霽城南舟中夜興

丙午五月大雨五日不止鏡湖渺然想見湖未廢  
時有感而賦

早自烏龍廟歸

齋中閒咏

秋雨北榭作

馬耆行



園中絕句

晨過天慶

出城

夜登千峰榭

秋興

余年二十時嘗在菊枕詩頗傳於人今秋偶復采菊縫枕囊悽然有感

東吳女兒曲

有為予言烏龍高嶮不可到處有僧巖居不知其  
年予每登千峰榭望之慨然為作詩

楚宮行

妾命薄

四鼓酒醒起步庭下

秋霽

採藥

塞上曲

送潘德久使薊門

夜歸塲街巷書事

送張野夫寺丞牧滁州

夜歸偶懷故人獨孤景略

月下小酌

鄰曲有未飯被追入郭者惘然有作

題湖邊旗亭

寓懷

題千秋觀懷賀亭

樊江

練塘

歸次樊江

泛湖至東涇

村居初夏

東關

七月一日夜坐舍北水涯戲作

以事至城南書觸目

梅花集句

題瑩上人二畫

剡谿

吳江

山家莫春

自詠

蓬萊館午憩

夢遊散闕渭水之間

秋夜

荷花

秋興

新晴

舍北望水鄉風物戲作絕句

禹跡寺南有沈氏小園四十年前嘗題小闕壁間  
偶復一到而園已易主刻小闕於石讀之悵然

小園

夜讀范至能攬轡錄言中原父老見使者多揮涕  
感其事作絕句

醉卧松下短歌

探梅

題四仙像

冬晴閒步東村由故塘還舍作

夜聞湖中漁歌

村夜

野意

憶昔

感懷





欽定四庫全書

御選唐宋詩醇卷四十五

山陰陸游詩四

秋興

樵風溪上弄扁舟  
濯錦江邊憶舊遊  
豪竹哀絲真昨夢  
爽砧繁杵又驚秋  
墜枝橘熟初堪剪  
浮瓮醅香恰受篘  
莫道身閒總無事  
孤燈夜夜寫清愁

三江舟中大醉

志欲富天下一身常苦飢氣可吞匈奴東帶向小兒天  
公無由問世俗那得知揮手散醉髮去隱雲海涯風息  
天鏡平濤起雪山傾輕帆入浩蕩百怪不可名虹竿秋  
月鉤巨鼇倘可求滅迹從今逝回看隘九州  
擬以太白便覺去人不遠

樊江晚泊

碧雲吞日天欲暮城西捩柁城東路蓴羹菰飯香滿船  
正是江頭落帆處荻洲漁火遠更明煙水蒼茫聞雁聲

不是綠尊能破悶  
白頭客路若為情

秋夕

羈魂虛仗些詞招  
病骨那禁積毀消  
亂葉打窗寒有信  
昏燈照幔夢無聊  
棧邊老驥心空在  
爨下殘桐尾半焦  
百感忽生推枕起  
碧霄銀漢正迢迢  
深於比興怨而不怒

秋雨排悶十韻

今夏久無雨  
從秋却少晴  
空濛迷遠望  
蕭瑟送寒聲  
衣

潤香偏著書蒸蠹欲生壞簷聞瓦墮漲水見堤平溝溢  
池魚出天低塞雁征螢飛明閣廡蛙鬧雜踈更藥醖時  
須焙舟閒任自橫未憂荒楚菊直恐敗吳杭夜永燈相  
守愁深酒細傾浮雲會消散鼓笛賽西成

方回曰字字工穩

寄題朱元晦武夷精舍

先生結屋綠巖邊讀易懸知屢絕編不用采芝驚世俗  
恐人謗道是神仙

身閒剩覺溪山好  
心靜尤知日月長  
天下蒼生未蘇息  
憂公遂與世相忘

惟朱子稱此詩惟此詩可寄朱子所云詩中有人者

### 長安道

千夫登登供版築  
萬手丁丁供斲木  
歌樓舞榭高入雲  
複幕重簾晝燒燭  
中使傳宣騎飛鞚  
達官候見車擊轂  
豈惟炎熱可炙手  
五月瞿唐誰敢觸  
人生易盡朝露晞  
世事無常壞陂復  
士師分鹿真是夢  
塞翁失馬猶為福

君不見野老八十無完衣歲晚北風吹破屋

言抵藥石體合風雅

村舍

空谷人稀到新寒病頓輕晨霜催小獵宿雨潤新耕草  
莽秦馳道雲煙越故城千年不磨滅惟有暮山橫  
有俯仰千古之感句法亦逼老杜

幽居感懷

偶傍楓林結數椽東歸也復度流年汀洲雁下依殘水

墟里人行破夕煙十月風霜欺客枕五更鼓角滿江天  
散關清渭應如昨回首功名一愴然

遲暮

遲暮固多感況此歲崢嶸霜霰忽已集夜聞絡緯鳴青  
燈不解語依依有餘情銅瓶煮寒泉中作笙簫聲沈憂  
能傷人一夕白髮生蓬萊渺雲海金丹幾時成

自若耶溪舟行杭鏡湖而歸

換馬亭前煙火微關牛橋畔行人稀雲山慘澹少顏色



霜日清薄無光輝  
新酒筍成桑正落  
美人信斷雁空歸  
高樓何處吹長笛  
清淚無端又濕衣

詞意清婉風調致佳

骨相

骨相元知薄  
功名敢自期  
病侵彊健日  
閒過聖明時  
形勝輪臺地  
飛騰瀚海師  
江湖雖萬里  
猶擬綴聲詩  
意自深深非  
闕骨相

感憤

今皇神武是周宣  
誰賦南征北伐篇  
四海一家天厯數  
兩河百郡宋山川  
諸公尚守和親策  
志士虛捐少壯年  
京洛雪消春又動  
永昌陵上草芊芊  
大聲疾呼氣浮紙  
上諸將五首之嫡嗣也

盧世灌曰南渡樂於偏安誰能念此

晚出偏門

一段新愁帶宿醒  
半歌烏帽策驢行  
村墟香動梅初破  
裘褐寒輕雪未成  
渡口人爭紅日晚  
沙邊雁帶碧煙橫  
悠然又覓長堤路  
腸斷城樓畫角聲

過杜浦橋

橋北雨餘春水生  
橋南日落暮山橫  
問君對酒胡不樂  
聽取菱歌煙外聲

莊器之作招隱閣項平父諸人賦詩予亦繼作

諸公共賦反招隱  
細字斜行肯見傳  
語到淮南小山作  
人如江左永和年  
一窗蘿月禁春瘦  
萬壑松風撼畫眠  
我亦尚嫌林谷淺  
因君更擬斷雲煙

溪上醉吟

行行不知溪路深  
但怪素月生遥岑  
不辭醉袖拂花絮  
與予更醉青蘿陰

雨中泊舟蕭山縣驛

端居無策散閒愁  
聊作人間汗漫遊  
晚笛隨風來倦枕  
春潮帶雨送孤舟  
店家菰飯香初熟  
市擔蓴絲滑欲流  
自笑勞身成底事  
黃塵陌上雪蒙頭

春潮七字與蘓州各成妙句

欽定四庫全書

御選唐宋詩醇  
卷四十五

初夏遊凌氏小園

水滿池塘葉滿枝  
曲廊危榭愜幽期  
風和海燕分泥處  
日永吳蠶上簇時  
閒理阮咸尋舊譜  
細傾白墮賦新詩  
從來夏淺勝春日  
兒女紛紛豈得知

原註庚信詩云夏  
淺却勝春競湖遊

人至立  
夏而止

題少陵畫像

長安落葉紛可掃  
九陌北風吹馬倒  
杜公四十不成名  
袖裏空餘三賦草  
車聲馬聲喧客枕  
三百青銅市樓飲

杯殘角冷正悲辛  
仗內闌難催賜錦

初冬雜題

莫嫌風雨作新寒  
一樹青楓已半丹  
身在范寬圖畫裏  
小樓西角剩憑闌

小雨

細細濕春光  
霏霏破夕陽  
卧聞驚倦枕  
起看入虛堂  
映葉鶯猶轉  
爭泥燕正忙  
閒愁無遣處  
誰與共飛觴  
工於賦物不落纖巧

題徐淵子環碧亭亭有茶山曾先生詩

茶山夫人厭囂譁幅巾每訪博士家小亭談笑不知暮  
往往城上聞吹笳興來傑作粲珠壁歲久妙墨亡龍蛇  
郎君弟子多白髮回頭日月如犇車徐卿赤城古仙子  
十年四海推才華覽觀陳迹喜不寐施補罅漏支傾斜  
曲池還浸古來月叢莽忽見當時花重題舊句照高棟  
力振風雅排滯哇席間紵袍已散鵠堂上講鼓初停撾  
速宜力置竹葉酒不用更淪桃花茶

原註桃花茶  
見曾公詩

臨安春雨初霽

世味年來薄似紗  
誰令騎馬客京華  
小樓一夜聽春雨  
深巷明朝賣杏花  
矮紙斜行閒作草  
晴窗細雨戲分茶  
素衣莫起風塵嘆  
猶及清明可到家

領聯團轉脫口而出一涉湊泊失此語妙

瞿佑曰陳簡齋詩云客子光陰詩卷裏  
杏花消息雨聲中  
陸放翁詩云小樓一夜聽春雨  
深巷明朝賣杏花  
皆佳句也  
葉靖逸詩云春色滿園關不住  
一枝紅

杏出牆來戴石屏詩云一冬天氣如春暖昨日街頭  
賣杏花句意亦佳可以追及之

盧世灌曰三四有唐人風韻

方回曰臨安春雨初霽一首劍南集編在嚴州朝辭  
時所作後村詩話乃謂妙年行都所賦思陵賞音似  
誤

飲張功父園戲題扇上

寒食清明數日中西園春事又匆匆梅花自避新桃李

不為高樓一笛風

寓意雖刻自足風調

盧世淮曰翻案妙有諷意

小舟過御園

聖主憂民罷露臺春風別苑晝常開盡除曼衍魚龍戲  
不禁芻蕘雉兔來水鳥避人橫翠靄宮花經雨委蒼苔  
殘年自喜身强健又作清都夢一回

善於立言

欽定四庫全書

御選唐宋詩醇  
卷四十五

九

春遊絕句

一百五日春郊行三十六溪春水生千秋觀裏逢急雨  
射的峰前看晚行

原註自秦望山而北合  
三十六溪水為若耶溪

雨後

礎潤還成雨雲收旋作晴巖花分日發林筍逐番生筆  
硯行常具軒窗晚更明塵埃幸不到那得廢詩情

夜汲

酒渴起夜汲月白天正青銅瓶響寒泉聞之心自醒井

邊雙梧桐映月影離離上有獨棲鵲細爪握高枝我欲

畫團扇良工不可求三歎拊庭楯浩然風露秋

落落有古意

新霽城南舟中夜興

身是江湖不繫船雨餘隨處一條然浮雲盡歛出青嶂  
孤月徐升行碧天收網漁歌移別浦隔城塔影落前川  
明朝閒就平洲飲中履追涼又一年

丙午五月大雨五日不止鏡湖渺然想見湖未廢

欽定四庫全書

御選唐宋詩醇  
卷四十五

十

時有感而賦

朝雨暮雨梅正黃城南積潦入車箱鏡湖無復鍼青秧  
直浸山脚白茫茫湖三百里漢訖唐千載未嘗廢陂防  
屹如長城限胡羗嗇夫有秩走且僵早有灌注水何傷  
越民歲歲常豐穰洊湖誰始謀不臧使我婦子饜糟糠  
陵遷谷變亦何常會有妙手開湖光蒲魚自足被四方  
煙艇滿目菱歌長

有闕國計民生非尋常歌詠可比

山陰志鏡湖綿跨二縣周迴三百五十八里東漢馬  
臻始築塘蓄水溉田九千餘頃迄於宋民甚利之祥  
符以來並湖之民盜湖為田熙寧中遣使至越不能  
復湖後遂盡廢為田皆已陞科議復古以興水利者  
常惜之而勢不可行

會稽志張元忬曰忬按諸家所論前乎漢而無海塘則鏡  
湖不可不築後乎宋而有海塘則鏡湖可以不復近者三  
江之閘其益百倍於海塘惟時其啟閉以常謹水利之大



網而於外塘務完之內流務濬之以時修水利之細目則  
受利不止一會稽矣又何鏡湖之足論乎

早自烏龍廟歸

殘漏聲中聽曳鈴翩翩吹帽出郊垌雨餘澗落雙虹白  
雲合山餘一髮青鐵馬蹴冰悲昨夢朱顏辭鏡感頽齡  
歸來獨對空齋冷鳥迹蒼苔自滿庭

齋中閒咏

風號萬物作濤聲雲截千峰似几平多病支離仍老境

暮秋蕭瑟更山城燕觴久罷塵痕積庭訟全稀藪暈生  
莫道齋中日無事焚香掃地又詩成

六句可謂深穩

秋雨北榭作

秋風吹雨到江濱小閣踈簾曉色分  
津吏報增三尺水山僧歸入萬重雲  
飄零露井無桐葉斷續煙汀有雁羣  
了却文書早尋睡檐聲偏愛枕間聞

方回曰此嚴陵郡圃也三四極工而活

馬者行

馬者山頭暮煙紫牛羊聲斷行人止  
平沙風急捲寒蓬  
天似穹廬月如水大胡太息小胡悲  
投鞍欲眠且復起  
漢家詔用李輕車萬丈戰雲來壓壘

馬者山下春雪晴莽莽惟有蒺藜生  
射麋食肉飲其血  
五穀自古惟聞名樵蘇切莫近亭障  
將軍臥護真長城  
十年牛馬向南睡知是中原今太平

園中絕句

溪北溪南飛白鷗  
夕陽明處見漁舟  
憑誰為剪機中素  
畫取天涯一片秋

晨過天慶

蘿月挂團壁  
松風號急灘  
孤燈經院曉  
殘雪醺壇寒  
騰欲閒扶杖  
何妨醉墮冠  
詩成興不盡  
萬里跨青鸞

三四語意工  
絕與棋聲花  
院靜  
幡影石壇高  
不可軒輊  
出城

翩翩烏帽出林垞  
掠面風微酒半醒  
戍火難尋玉關夢

衣塵空愧草堂靈  
天晴山雪明城郭  
水漲江流近驛亭  
客髮不如堤上柳  
數枝春動又青青

夜燈千峰榭

夷甫諸人骨作塵  
至今黃屋尚東巡  
度兵大岷非無策  
收泣新亭要有人  
薄醪不澆胷壘塊  
壯圖空負膽輪囷  
危樓挿斗山街月  
徙倚長歌一愴神

從空而下氣象高  
遠歸咎王呂自是  
千古公論

潘問奇曰劍南詩  
操觚家奉之如拱  
壁然一時所為

翕然者不過喜其陶寫風雲流連月露而已而其惓  
惓宗國悱惻纏綿顧未有及之者予為一一標識之  
使知先生當日傷半壁之無依痛兩宮之不返終天  
歎悼不徒區區景物間也比少陵庶幾一飯不忘之  
誼云

秋興

孤城寂寞近江干處處踈砧送早寒  
水綠纔餘半篙綠  
霜高初染一林丹  
民租屢減追胥少吏責全輕法令寬

偶有一樽聊獨醉強按黃菊助清歡

余年二十時嘗作菊枕詩頗傳於人今秋偶復采菊縫枕囊悽然有感

采得黃花作枕囊曲屏深幌閤幽香喚回四十三年夢  
燈暗無人說斷腸

少日曾題菊枕詩蠹編殘橐鎖蛛絲人間萬事消磨盡  
只有清香似舊時

黯然自傷與沈園二絕所感同而詞亦並工蓋發乎情

者深也

東吳女兒曲

東吳女兒語如鶯十三不肯學吹笙鏡奩初喜穉蠶出  
窗眼已看雙繭成庭空日暖花自舞簾卷巢乾燕新乳  
阿弟貪書下學遲獨揀詩章教鸚鵡

絕似皮陸

有為予言烏龍高嶮不可到處有僧巖居不知其  
年予每登千峰榭望之慨然為作詩



樵子向予說有僧巢翠微巖扉雲共宿錫杖鶴同飛日暮松明火天寒櫟葉衣棄官從此逝非子尚誰歸

楚宮行

漢水方城一何壯大路並馳車百輛軍書挿羽擁修門  
楚王正醉章華上璇題藻井窮丹青玉笙寶瑟聲冥冥  
忽聞命駕遊七澤萬騎動地如雷霆清晨射獵至中夜  
蒼兕玄熊紛可藉國中壯士力已殫秦寇東來遣誰射

妾命薄

原註太白作此篇言  
長門宮事予反之

妾命薄早入天家侍帷幄君王勤儉省宴遊寶柱朱弦  
塵漠漠日長別殿承恩稀肝旻猶聞親萬機宮中雖無  
珠玉賜塞上不見煙塵飛不須悲傷妾命薄命薄却令  
天下樂

高處立潤處行

四鼓酒醒起步庭下

酒解夜過半出門步中庭天高河漢白月澹煙霧青重  
滴竹杪露疎見樹罅星壞甃啼寒蛩深竹明孤螢秋晚

雖未霜蠹葉時自零四序逝不留慨然感頽齡平生茅  
一把不博帶萬釘鵠溝謝拍拍鴻路追冥冥

秋霽

灝氣明山川霽色滿天地西風吹我衣忽有萬里意中  
原運當平所要在得士餘年猶幾何棄置復棄置  
短幅森嚴中極頓挫之妙

採藥

簣子編成細箬新獨穿空翠上嶙峋丹砂巖際朝曦日

狗杞雲間夜吠人  
絡石菖蒲蒙綠髮  
纏松薜荔長蒼鱗  
金貂謁帝我未暇  
且作人間千歲身

塞上曲

將軍許國不懷歸  
又見桑乾木葉飛  
要識君王念征戍  
新秋已報賜冬衣

自合唐音

送潘德久使薊門

崑崙東分一枝渾  
犇蹴砥柱經龍門  
義皇受圖撫上古

神禹治水開中原三靈實扶藝祖業萬國共仰東都尊  
羣兒撞壞吁可歎顧使殘虜今遊魂因君試求出師路  
孟津白馬應如故不須更議繫河橋北風正可乘冰渡  
頗聞盧龍已數盡復道飛狐合屯戍轅門倘駐拂雲祠  
烽火應過明妃墓君歸解鞍藉芳草細談塞北忘予老  
讀書飲酒待賊平萬丈旄頭方下掃

老驥伏櫪志在千里游豈須臾忘恢復者况觸事感懷  
耶端莊雜流麗剛健含婀娜可以語此詩之妙

夜歸塲街巷書事

近坊燈火如晝明十里東風吹市聲遠坊寂寂門盡閉  
只有煙月無人行誰家小樓歌惱儂餘響縹緲縈簾櫳  
苦心自古乏真賞此恨略與吾曹同歸來空齋卧淒冷  
燈前病骨巉巉影獨吟古調遣誰聽聊與梅花分夜永

送張野夫寺丞牧滁州

皇天方憂九州裂建隆真人仗黃鉞陣雲冷壓清流關  
賊壘咿嚶氣如髮逋誅猾虜入檻車北風吹乾草頭血

一龍上天三百年舊事空聞遺老說金印斗大誰作州  
公子玉面蒼髯虬賦詩健筆挾風雨論兵辯舌森戈矛  
別君帳飲灞橋頭長歌為君寬旅愁戰場遺迹儻可畫  
尺素寄我關河秋

唐之子孫不能以天下取河北志士之慨於言外見之  
夜歸偶懷故人獨孤景略

買酒村場半夜歸西山落月照柴扉劉琨死後無奇士  
獨聽荒雞淚滿衣

觸緒長嗟言在此而意在彼十四字中波瀾甚濶賀裳詩話乃謂務觀才具無多意境不遠惟善寫眼前景物豈非但見方隅者耶

月下小酌

草樹已秋聲郊原喜晚晴風生雲盡散天濶月徐行下箸槎頭美傳杯甕面清追歡猶可勉徂歲不須驚

鄰曲有未飯被追入郭者憫然有作

春得香秔摘綠葵縣符急急不容炊君王日御金華殿



誰誦周家七月詩

親民之官莫如守令與人主共養百姓同休戚者其惟良吏乎漢治之稱文景有以也

題湖邊旗亭

春色初回杜若洲佳人又典鵲鸞裘八千里外狂漁父五百年前舊酒樓渡口遠山顰翠黛天邊新月挂瓊鉤回頭笑向紅塵說也有閒愁到此不

落筆豪俊宋人常問人云君詩中有幾酒樓此亦一酒

樓也

寓懷

脫粟未為飢短褐未為寒衆毀心自可身困氣愈完  
茆屋雖三間趺坐則已寬濁酒不滿瓢浩歌有餘歡  
祿食妻子樂功名後人看成敗兩蝸角貴賤一鼠肝  
芒芒百年夢底物堪控搏不如學餐霞駐此雙頰丹  
行披終南雲飛渡黃河湍歸然過空城人言古長安  
霜露蒙荆榛喟然增永歎

國恥未雪此老終身大恨固其忠義所結然言之頻數亦為筆墨之累此乃別有波瀾言盡而意不盡

題千秋觀懷賀亭

河湟使典珥左貂曲江相君謝不朝宮中玉環狐作妖  
黠虜旁窺心已驕天維欲絕地軸搖有識凜凜憂宗祧  
賀公託言師松喬黃冠徑歸侶漁樵老馬立仗不自聊  
去如鸞風冲煙霄傾都祖餞擁渭橋賢哉大夫脫塵囂  
揚州渡江木蘭橈入東夜聽錢塘潮我來故祠竹蕭蕭

黃冠野服傳生綃詞卑媿匪英瓊瑤空采蘋藻冥桂椒  
虛堂斷香閑寂寥遺魂零落何由招

論古別有見解

樊江

手中一卷養魚經又向樊江上草亭朝雨染成新漲綠  
春煙澹盡遠山青榜舟不厭頻來往岸幘常須半醉醒  
賦罷新詩自高詠滿汀鷗鷺欲忘形

自饒雅韻

練塘

微風吹頰酒初醒  
落日舟橫杜若汀  
水秀山明何所似  
玉人臨鏡暈螺青

歸次樊江

芳草東西路綠楊長短亭  
人生豈飽繫吾志本鴻冥  
征袖朝霑雨歸帆夜戴星  
長魚幸能買且復倒殘瓶

泛湖至東涇

春水六七里夕陽三四家  
兒童收鵝鴨婦女治桑麻  
地

僻衣巾古年豐笑語譁老夫維小艇半醉摘藤花

村居初夏

天遣為農老故鄉小園三畝鏡湖傍嫩莎經雨如秧綠  
小蝶穿花似繭黃斗酒隻雞人笑樂十風五雨歲豐穰  
相逢但喜桑麻長欲話窮通已兩忘

盧世漣曰此景真不可多得

東園

煙水蒼茫西復東扁舟又繫柳陰中三更酒醒殘燈在

卧聽蕭蕭雨打篷

七月一日夜坐舍北水涯戲竹

兀傲胡床酒半醒  
釣筒收盡數舟橫  
風生細葛無三伏  
月上疎林正四更  
北斗離離低欲盡  
明河脉脉去無聲  
斥僊豈復塵中戀  
擬騎鯨返玉京

以星河供點染  
少加運用便有景有情

以事至城南書觸目

十里西風吹帽  
羣江城衣杵遠猶聞  
路如劍閣逢秋雨

山似爐峰鑠暮雲原上老翁眠  
犢背籬根小婦牧羊羣  
百錢且就村場醉舌本醇醪莫苦分

感舊意正以不露為佳

梅花絕句

憶昔西戍日夜宿僊人原  
風吹野梅香夢繞江南村  
低空銀一鉤糝野玉三尺愁  
絕水邊花無人問消息

題瑩上人二畫

天地又秋風谿山憶剡中  
孤舟幸閒著借我訪支公



右剡谿

曉聽楓橋鐘暮泊松江月斯人亦可人淡墨寫愁絕

右吳江

山家暮春

遶屋清陰合綠堤綠草纖起蠶初放食新麥已磨鎌苦  
筍先調醬青梅小蘸鹽佳時幸無事酒盡更須添

瑣事老筆

自詠

萬事不挂眼終年常避人  
荒畦荷鋤晚環堵結茆新  
病馬何勞斥輕鷗未肯馴  
雖慙市門卒聊作葛天民

蓬萊館午憇

驛門繫馬聽蟬吟  
翻動平生萬里心  
橋畔笛聲催日落  
城邊草色帶煙深  
關河歷歷功名晚  
歲月悠悠老病侵  
憶戍梁州如昨日  
憑闌西望一霑襟

盧世瀛曰悲壯

夢遊散關渭水之間

平生望眼怯天涯客裏何堪度歲華但恨征輪無四角  
不愁客路有三義驛窓燈閣傳秋杳樹煙深宿暮鴉  
叱犢老翁頭似雪羨渠生死不離家

完題簡淨

秋夜

清夜不成寐出門還浩歌斷雲微翳月薄露不傾荷絡  
緯知時早梧桐奈汝何非關老懷惡秋物感人多

荷花

風露青冥水面涼  
旋移野艇受清香  
猶嫌翠蓋紅粧句  
何況人言似六郎

隨手翻新居然佳語

### 秋興

老子雖貧未易量  
風流猶在小茅堂  
蒲萄錦覆桐孫古  
鸚鵡螺斟玉瀝香  
千點荷聲先報雨  
一林竹影剩分涼  
秋來便有欣然處  
新種蓴絲已滿塘

### 新晴

積雨已淒涼新晴還少和稼收平野濶木落遠山多土  
潤朝畦菜機鳴夜擲梭時清年歲好吾敢歎蹉跎

盧世灌曰領聯自是佳句

舍北望水鄉風物戲作絕句

西風沙際矯輕鷗落日橋邊繫釣舟乞與畫工團扇本  
青林紅樹一川秋

禹跡寺南有沈氏小園四十年前嘗題小闕壁間  
偶復一到而園已易主刻小闕於石讀之悵然

楓葉初丹槲葉黃河陽愁鬢怯新霜林亭感舊空回首  
泉路憑誰說斷腸壞壁醉題塵漠漠斷雲幽夢事茫茫  
年來妄念消除盡回向禪龕一炷香

周密曰放翁娶唐氏於其母為姑姪而不相得出之  
後改適趙士程嘗以春日出遊相遇於禹跡寺南之  
沈氏園唐以語趙遣致酒肴翁悵然久之為賦釵頭  
鳳詞題園壁間集中紅酥手黃藤酒一闋是也唐氏  
見而和之未幾下世

小園

窄窄柴門短短籬山家隨分有園池客因問字來携酒  
僧趺分題就賦詩晨露每看花蕊坼夕陽頻見樹陰移

原註此二事非  
閒寂不知也

拂衣司諫猶忙在此趣淵明却少知

盧世雍曰閒情逸事惟外人知之

夜讀范至能攬轡錄言中原父老見使者多揮涕

感其事作絕句

公卿有黨排宗澤帷幄無人用岳飛遺老不應知此恨

亦逢漢節解沾衣

南渡之不振實由於此扼腕而言自成高調

醉卧松下短歌

披鹿裘枕白石醉卧松陰當月夕  
寒藤夭矯學此書天風蕭森入詩律  
忽然夢上百尺顛綠毛邂逅巢雲仙  
相携大笑咸陽市俯仰塵世三千年

造語入妙

探梅



我遊東村衝暮煙斷橋流水鳴澌澌欲尋梅花作一笑  
數枝忽到拄杖邊高標元合著山澤絕豔豈復施丹鉛  
定知曾授餐玉法不爾恐是凌波仙錦江賦詩忽萬里  
蓬山把酒今三年相逢風味宛如昨人生何者非前緣  
頗思取醉極清賞杖頭幸有百許錢但判揷破烏紗帽  
莫記吹落黃金船

趣極自然調亦清婉

題四仙像

世上年光東逝波  
咸陽銅狄幾摩挲  
神仙不死成何事  
只向秋風感慨多

冬晴閒步東村由故塘還舍作

紅藤拄杖獨相羊  
路遶東村小嶺傍  
水落枯萍粘蟹榼

原註鄉人植竹以取蟹謂之曰榼

雲開寒日上魚梁  
洛陽二頃言良是

光範三書計本狂  
歷盡危機識天意  
要令閒健返耕桑  
方回曰五六善用事蟹榼句尤新

盧世淮曰瑣事寫來亦新緻

祖應世曰一路細細領畧淺蹤人安能有此

夜聞湖中漁歌

夢回一燈翳復明卧聞湖上漁歌聲  
嗚嗚乍低忽更起  
娟娟欲斷還微縈初隨缺月墮煙浦  
已和殘角吹江城  
悲傷似繫漸離筑忠憤如撫桓伊箏  
放臣萬里憂國淚  
戍客白首懷鄉情峽猿失侶方獨宿  
沙雁垂翅猶遐征  
巴巫竹枝短亭曉瀟湘歎乃孤舟橫  
世間此恨故相似  
使我百感何由平

一氣排宕有風雨驟至之勢只用一語收結老氣無敵

村夜

寂寂山村夜悠然醉倚門月昏天有暈風軟水無痕迹  
為遭讒遠身由不仕尊敢嗟車馬絕同社自雞豚

潘問奇曰風軟水無痕未經人道

野意

隄長逾十里村小只三家山客弛樵擔溪翁鳴釣車花  
深迷蝶夢雨急散蜂衙衰疾新年減青鞵上若耶

憶昔

憶昔西征日飛騰尚少年軍書挿烏羽戍壘候狼煙渭  
水秋風夜岐山曉雪天金韉馳叱撥繡袂舞嬋娟但恨  
功名晚寧知老病纏虎頭空有相麟閣竟無緣壯士埋  
巴峽原註獨孤策孤身卧海壖安西九千里孫武十三篇裘  
嘆蘇秦樊榘憂祖逖先何時聞詔下遣將入幽燕

筆力健舉

感懷

卜居鏡湖上一菴環翠屏竹林藏谿谷嶺路蟠青冥  
騰立竒石巔絕瞻危亭車馬雖埽迹猿鳥與忘形  
我行半九州跼盡芒屨青豈知雪滿鬢於茲故雲  
局丹砂收箭鏃茯苓斲人形遼天渺歸鶴一瞬三  
千齡

殘年迫哀謝嬰疾歸鄉枌諸賢渡江初總角幸有聞才  
非楚倚相亦能讀典墳夫豈或使之後死與斯文世儒  
鑿戶牖道術將瓜分孤陋守一說百氏殆可焚後來豈  
無人鼻堊誰揮斤巍巍貞觀治房魏出河汾

文集答劉主簿書前輩之學積小以成大以所有易  
所無以能問於不能故其久也汪洋浩博該極百家  
而不可涯涘諸名勝渡江去前輩尚未甚遠故此風  
猶不墜三二十年來士自為畦畛甚狹已所未知者  
輒訕薄之以為不足學詆窮經者則曰傳註已盡矣  
詆博學者則曰不知無害為君子嗚呼陋哉

御選唐宋詩醇卷四十五